



KEMENTERIAN KERJA RAYA
MALAYSIA

KENYATAAN MEDIA

PEMBERIAN TOL PERCUMA SEMPENA SAMBUTAN PERAYAAN TAHUN BARU CINA

KUALA LUMPUR - Susulan pengumuman YAB Perdana Menteri dan selaras dengan aspirasi Kerajaan Perpaduan dalam menitikberatkan soal kebajikan rakyat yang sering bergelut dengan isu kos sara hidup, Kerajaan melalui Mesyuarat Jemaah Menteri pada 18 Januari 2023 telah bersetuju untuk memberikan tol percuma kepada **semua jenis kelas kenderaan pada 20 dan 21 Januari 2023.**

Inisiatif ini dilaksanakan sebagai meraikan kesemua rakyat Malaysia terutamanya masyarakat kaum Cina yang menyambut perayaan Tahun Baru Cina. Ini juga adalah bertepatan dengan konsep Masyarakat Madani yang diilhamkan oleh YAB Perdana Menteri di dalam program Permukiman Anggota Jemaah Menteri Kerajaan Perpaduan yang diadakan baru-baru ini di mana golongan sasaran bantuan Kerajaan mestilah merentasi kepelbagaian agama, kaum dan kepercayaan. Semua golongan yang memerlukan bantuan haruslah dibantu dengan sebaiknya tanpa mengambil kira perbezaan rupa dan warna kulit.

Pemberian tol percuma ini akan dilaksanakan di kesemua lebuh raya yang **bermula pada jam 12.00 tengah malam, 20 Januari 2023 (Jumaat) dan akan berakhir pada jam 11.59 malam, 21 Januari 2023 (Sabtu).** Inisiatif ini melibatkan implikasi kewangan dianggarkan berjumlah **RM40 juta.**

Pelaksanaan tol percuma ini juga adalah tanda keprihatinan Kerajaan dalam menyambut kemeriahan perayaan Tahun Baru Cina yang merupakan simbolik kepada titik permulaan dalam kehidupan masyarakat Cina setiap tahun.



KEMENTERIAN KERJA RAYA
MALAYSIA

KENYATAAN MEDIA

Upacara makan besar pada malam Tahun Baru Cina merupakan acara yang dinantikan oleh masyarakat Cina. Ahli keluarga tentunya ingin mengambil peluang ini untuk pulang ke kampung bagi meluangkan masa bersama saudara-mara dan kaum keluarga. Aspek kekeluargaan yang penuh kasih sayang ini wajar dipupuk dan diberi sokongan oleh Kerajaan supaya institusi kekeluargaan yang merupakan unit asas dalam komuniti dapat berfungsi dengan baik sekaligus dapat melahirkan warga negara yang cemerlang.

Dengan pelaksanaan diskaun tol ini diharapkan agar pengguna lebuhraya dapat memanfaatkan peluang ini dengan sebaiknya dan merancang perjalanan dengan sewajarnya dan dinasihatkan mematuhi cadangan jadual waktu perjalanan atau *travel time advisory* (TTA) yang disyorkan. **Aspek keselamatan serta pemanduan selamat perlulah dipatuhi** supaya semua pengguna lebuhraya dapat sampai ke destinasi dengan selamat dan sambutan perayaan Tahun Baru Cina ini akan menjadi lebih bermakna bersama keluarga tercinta. Pengguna juga dinasihatkan untuk mendapatkan rehat secukupnya dan memastikan baki kad Touch 'n Go serta eWallet adalah mencukupi.

Selamat Menyambut Tahun Baru Cina.

DATO SRI ALEXANDER NANTA LINGGI
MENTERI KERJA RAYA
19 JANUARI 2023